

Geran sepadan SSPN bantu B40

PTPTN bantu rakyat menabung untuk jangka masa panjang

Oleh RAJA NUR FAZNE AIDA
RAJA ZAINUDIN

SHAH ALAM

Perbadanan Tabung Pendidikan Tinggi Nasional (PTPTN) menawarkan beberapa insentif berbentuk geran sepadan kepada rakyat yang menabung secara konsisten terutama untuk jangka masa panjang.

Pengerusi PTPTN, Datuk Wan Saiful Wan Jan berkata, PTPTN amat menggalakkan rakyat yang ber-

pendapatan bawah RM4,000 menabung bagi tujuan pendidikan tinggi anak-anak.

“Kita sediakan geran sepadan sebagai tambahan kepada jumlah tabungan mereka dalam SSPN-i. Mereka boleh membuat simpanan dari RM1 sehingga RM10,000.

“Katahal dia simpan dalam jangka masa 10 tahun, maka setiap ringgit yang dia simpan, kita akan beri pulangan 100 peratus iaitu sehingga RM10,000. Kemudian hujung tahun ke-10, kita akan tambah RM10,000 lagi.

“Jadi secara keseluruhan dia akan memperoleh sehingga RM20,000 apabila anaknya



Wan Saiful (kanan) menjadi tetamu program Sinar Live bertajuk 'PTPTN Sahut Cabaran, Galas Tanggungjawab' di Kumpulan Karangkrak, Shah Alam.

hendak masuk ke universiti.

“Saya rasa belum ada badan lain yang menawarkan kelebihan sebagaimana dilakukan PTPTN,” katanya pada program Sinar Live bertajuk 'PTPTN Sahut Cabaran, Galas Tanggungjawab'.

Mengulas lanjut, beliau berkata, dividen untuk Skim Simpanan Pendidikan Nasional

(SSPN) bagi tahun lalu mencecah empat peratus dan ia merupakan satu kadar yang tinggi.

“Berbanding dengan akaun simpanan lain, saya yakin dividen PTPTN adalah antara yang paling tinggi di negara ini setakat ini,” katanya.

Dalam perkembangan sama, Wan Saiful berkata, pi-

haknya dalam peringkat akhir untuk melancarkan pelan strategik baharu dan ia akan dilaksanakan dalam masa terdekat.

“Fokus kita nanti adalah untuk memastikan maklumat sampai ke seluruh negara termasuklah insentif geran sepadan yang ditawarkan sekiranya mereka menabung dengan PTPTN.

“Ramai yang masih tidak tahu mengenai insentif ini,” kata beliau.

Sehubungan itu, beliau berkata, pihaknya berusaha sedaya upaya untuk memastikan PTPTN dikenali dengan satu imej baharu sebagai Tabung Pendidikan.

“Kita nak ubah dari satu reputasi sebagai badan pemberi pinjaman kepada badan yang menyediakan produk tabungan.

“Inilah yang kita telah lakukan sepanjang tiga tahun lepas dan kita akan teruskan lagi tahun ini,” katanya.

MAFI peruntuk RM21 juta bantu usahawan muda seawal usia 18 tahun

PUTRAJAYA - Kementerian Pertanian dan Industri Makanan (MAFI) memperuntukkan sebanyak RM21 juta pembiayaan melalui Skim Usahawan Muda (Agro-YES).

Menteri Pertanian dan Industri Makanan, Datuk Seri Dr Ronald Kiandee berkata, kemudahan pembiayaan khusus itu disasarkan kepada usahawan muda.

“Produk ini bertujuan membantu mereka mendapatkan pembiayaan pertanian bagi projek pengembangan seperti tanaman, ternakan, perikanan dan industri makanan,” katanya pada sidang akhbar selepas melancarkan Agro-YES di kementerian pada Khamis.

Hadir sama Timbalan Menteri I, Datuk Seri Ahmad Hamzah dan Ketua Setiausaha, Datuk Haslina Abdul Hamid.

Menurutnya, Agro-YES boleh dimohon oleh usahawan pertanian berumur 18 hingga 40 tahun yang telah menjalankan projek pertanian dan beroperasi lebih 12 bulan.

“Setiap permohonan layak mendapat pembiayaan sehingga RM500,000 melalui Agrobank dengan kadar faedah



Ronald Kiandee (tengah) menyaksikan penyerahan Pembiayaan Agro-Youth Entrepreneur Scheme (Agro-Yes) oleh Haslina (kanan) kepada Penanggung Tugas Presiden/Ketua Pegawai Eksekutif Agrobank, Khadijah Iskandar (kiri) pada majlis pelancaran tersebut di MAFI pada Khamis.

minimum iaitu dua peratus setahun,” katanya

Beliau berkata, Agro-YES telah dijenamakan semula daripada Pembiayaan Khas Agropreneur Muda yang melalui proses penambahbaikan.

“Antaranya mengurangkan

birokrasi dalam rantaian permohonan dan pengurangan tempoh masa pemrosesan daripada dua bulan kepada 14 hari,” katanya.

Ronald berkata, MAFI sentiasa berusaha untuk menggalakkan penyertaan golongan

muda dalam sektor pertanian dan menjadikannya sebagai industri progresif serta berdaya saing.

“Pada tahun lalu MAFI telah berjaya meningkatkan penglibatan 1,159 golongan muda dengan bantuan geran

dan pembiayaan berjumlah RM23 juta,” katanya.

Ditanya mengenai jumlah peruntukan RM21 juta, beliau berkata, sekiranya dana berkenaan telah habis dimohon, Kementerian tidak teragak-agak membuat permohonan baharu kepada Kementerian Kewangan (MOF).

“Tiada halangan untuk kita kemuka permohonan dana kepada MOF kerana ia memberi manfaat kepada anak muda,” katanya.

Sementara itu, Pengerusi Agrobank, Datuk Mustapha Buang berkata, usaha Agrobank dalam menggerakkan dan memajukan sektor pertanian negara sentiasa menjadi keutamaan Agrobank.

“Dalam memakmurkan sektor pertanian di Malaysia, pelbagai usaha telah dijalankan bagi merealisasikan hasrat ini.

“Menerusi pelancaran produk, Agrobank berharap pembiayaan ini akan dapat membantu golongan muda menceburi perniagaan berasaskan agro sekali gus menjana pendapatan yang progresif, berdaya saing, kreatif dan inovatif,” kata beliau.